

自娛以休世焉以嘉泰癸亥三月告衆曰吾世緣將盡未幾問左右曰今日月半耶對曰然卽索紙作遺書與平昔所厚者集衆叙別皆法門之旨要無半語及他事索浴更衣大書云八十三年彌天罪過末後殷勤盡情說破泊然而逝弟子塔全身于庵後僧臘六十謚普慧宗覺大禪師塔曰圓鑑

明河曰南渡後宗師唯妙喜老子得人爲多開堂說法顯然爲天人師者不下數十人然皆不數傳寂寂矣能使道脉長永枝葉繁茂不忝師門傳受唯師一人而已古稱妙喜能大圓悟之門愚謂妙

喜之得師猶圓悟之得妙喜續燈舉妙喜之嗣契悟廣大者九人師不與焉已失其鑑至謂弟子之超卓者又蚤世不使久開法俾法嗣廣布然則師豈非超卓而天者耶意所謂瞋目而不見泰山也



國家圖書館, NATIONAL CENTRAL LIBRARY, TAIWAN, R.O.C.


補續高僧傳卷第十一

明吳門華山寺沙門明河撰

習禪篇

宋薦福本禪師傳

悟本江州人也自江西雲門叅侍妙喜至泉南小溪于時英俊畢集受印可者多矣師私謂其棄已欲發去妙喜知而語之曰汝但專意叅究如有所得不待開口吾已識也既而有聞師入室者故謂師曰本侍者叅禪許多年逐日只道得箇不會師諾之曰這小鬼你未生時我已三度霍山廟裏退牙了好教你知



絲茲益銳志提狗子無佛性話一夕將三鼓倚殿柱昏寐間不覺無字出口吻間忽爾頓悟後三日妙喜自郡城歸師趨丈室足纔越閫未及吐詞妙喜曰本鬚子這回方是徹頭也因過尋同叅謙公於建陽菴中謙舉保寧頌五通仙人因緣曰無量劫來曾未悟如何不動到其中莫言佛法無多子最苦瞿曇那一通謙復曰我愛他如何不動到其中既是不動如何則看他古人得了等閑拈出來自然抓著人癢處師曰因甚却道最苦瞿曇那一通謙曰你未生時吾已三度霍山廟裏退牙了也於是相顧大笑其友朋琢

磨之益蓋如印圈契爲之無差至於會心鞮然可使後世想望風采師住博山規模立而法道弘時雪堂行和尚住薦福有僧自福州來雪堂問沿路見好長老否僧云近過信州博山住持本和尚雖不曾拜識好長老也雪堂曰安得知其爲好僧云入寺路逕開闢廊廡修整殿堂香燈不絕晨昏鐘鼓分明二持粥飯精潔僧行見人有禮以此知其爲好長老雪堂笑曰本固賢矣然爾亦具眼直以斯言達於郡守吳公傅朋曰遮僧持論頗類范延齡薦張希顏事而閣下之賢不減張忠定公老僧年邁乞請本以代庶爲林

下盛事吳公大喜師卽日遷薦福雪堂嗣龍門遠公師叔行也

菡堂機傳

行機號菡堂台州楊氏子風姿挺特才壓儒林年二十五棄妻孥學出世法晚見此菴密有契證入番陽筦山單丁住十七年嘗值隆冬雨雪連作餽粥不繼師如不聞見有頌云地爐無火客囊空雪似楊花落歲窮拾得斷麻穿壞衲不知身在寂寥中每謂人曰某猶未穩在住山豈吾事耶一日偶看斫樹倒地忽大悟平昔礙膺之物泮然冰釋未幾有江州圓通之

命乃曰吾道將行卽欣然曳杖而去登座說法云圓通不開生藥舖單單只賣死猫頭不知那箇無思算喫著通身冷汗流緇白驚異法席因茲大振自圓通移國清退居景星巖與給事吳芾爲方外友淳熙五年自景星赴隱靜吳和淵明詩十三篇送其行深致戀戀之情與師早歸回逸老也師清明夷坦衲子稍有詿誤蔽護保惜以成其德嘗言人誰無過在改之爲美住筦山日常下山聞路傍哀泣聲師惻然詢之一家寒疾僅亡兩口貧無斂具特就市貸棺葬之鄉人感歎不已侍郎李椿年謂士大夫曰吾鄉機老有

道衲子也加以慈惠及物筦山安能久處乎平生以道自適不急榮名赴圓通請隨身唯拄杖草履而已見者色莊意解九江守林叔達目之曰此佛法中津梁也其去就真得前輩體格故歿之日雖走使致力爲之涕下

或菴體傳

師體號或菴台州羅氏子初叅此菴元布衲於天台護國因舉龐馬選佛頌至第三句此菴喝之師大悟遂匿跡深山中丞相錢象先慕其爲人致以天封勉令出世師搖手曰我不解懸羊頭賣狗肉也卽宵遁

去乾道初瞎堂住國清因見師圓通像贊驚喜曰不謂此菴有此兒遍索之得之江心於稠人中請爲第一座及瞎堂遷虎丘師訪焉平江道俗請住覺報覺報舊名老壽菴師曰先師囑我他日逢老壽止今若合符契遂欣然應命入院小叅曰道常然而不渝事有弊而必變昔江西南嶽諸祖各稽古爲訓考其當否持以中道務合人心以悟爲則所以素風泠然逮今未泯若約衲僧門下言前薦得屈我宗風句下分明沉埋佛祖然雖如是行到水窮處坐看雲起時絲是緇素喜所未聞歸者如市淳熙六年移焦山將化

示微恙手書附硯一隻別郡守侍郎曾逮至中夜說
偈畢脫去年七十二也會公以偈悼之曰翩翩隻履
逐西風一物渾無布袋中畱下陶泓將底用老夫無
筆制虛空會亦知言者矣師荷法以身爲教不專於
言常曰叢林保於衲子衲子保於道德又曰得一身
之榮不如得一世之名得一世之名不如得一賢衲
子使後學有師叢林有主嗚呼天下之至私者無如
此身遠得一步身近得一步道故師二保三得之說
誠絕世名言願終身誦之不敢忘也

元枯木傳

祖元七閩林氏子初謁雪峯頂佛心才皆已契機後
叅妙喜於海上洋嶼菴風骨清癯危坐終日妙喜目
爲元枯木以剔燈有悟妙喜贈之以偈洋嶼發明大
事者十三人師其一也居連江福嚴菴食指猥衆日
不暇給菴有伽藍土偶甚夥師揭偈於祠曉之曰小
菴小舍小叢林土地何須八九人若解輪番來打供
免教碎作一堆塵是夕神致夢於山前檀越願如所
戒及出世鴈山能仁示徒偈曰鴈山枯木實頭禪不
在尖新句語邊背手忽然摸得着長鯨吞月浪滔天
瑩仲温曰師在當時朋伍中最號癡鈍及其遯跡神

亦遵從以至應緣徒尤趨慕蓋自般若殊勝中來豈有他哉

妙峯善禪師傳

妙峯善禪師劉氏子世居彭城後徙吳興年十三落髮其師教以經論一覽輒了大意久而棄之時佛焰唱道鄮山師往叅焉于風幡話下悟旨佛焰可以偈曰今日與君通一線斬釘截鐵起吾宗自是辯慧泉湧然不以是自足入武康廬妙高峯壁坐十年身隱而名彰學者尊之曰妙峯禪師出世於台之慧因鴻福萬年諸刹退居臯亭劉寺者又十餘年其徒推迫

不已復領明之瑞巖蘇之萬壽常之華藏次至靈隱靈隱密邇于闕輪蹄集師掩戶若不聞一無所將迎公卿貴人或見之寒溫而已會天童虛席時鄭清之秉鈞軸謂非師莫宜居因勉師行師答曰老僧年耄矣尚夜行不休乎鄭公高之師善於誘掖後進未嘗厲聲色然一經指授無不心融神化充然有得相傳師住靈隱時夜坐方丈爲四鬼舁出入此與洞山寶事相類得道人時或有是不欲章異以惑修故諱而不言中峯所謂當時賴遇妙峯若王老師又作修行無力會也將示寂澡身趺坐書偈云來也如是去

也如是來去一如清風萬里遂逝

妙空智訥禪師傳

智訥姓夏氏秀之崇德人母夢一婦人著黃衣寘一兒盆中舉而授之因娠生而穎秀甫四歲事其兄慈相上人道孜十四得度器質不凡追營香火練習戒律已如成人久之悟歎曰吾修無上道而求之文句中是刻舟也卽舍去學禪於桐川之天寧一日度礪有文書出流水中攬取視之乃心經也讀之五蘊皆空恍然若有契于心者走姑蘇瑞光見淨照信公公一見喜曰宿世沙門也未幾淨焰徒住真州長蘆會

學去來率數百人師學成行尊齒其高第淮人敬愛之曰有如訥公而不坐道場可乎延住天寧禪寺賜妙空大師儀真當二江三吳舟車之會檀施大集鼎新一刹幾至萬礎建炎初住靈隱慈聖獻皇后車駕臨幸詔師升坐說法賜號佛海明年金人陷錢塘師被執大酋解師縛置一榻尊事之比去飭十騎送還咸安王韓世忠表請平江靈巖爲功德院薦先福命師主之已去復畱凡五更住持前後二十餘年最後被詔住徑山紹興二十七年師持鉢詣秀州華亭縣人朱飛卿者聞師名具蒲饌卜日馳書以請師以十

一月二十六日至其家據坐說法緇素咸會有僧出膜拜問生死根本師酬對語未卒舉拂扣床一擊而逝道俗奔赴空巷相登贊歎作禮如佛滅度其徒具舟載歸山中則已有治命矣七日而斂舉體如生葬於寺之白雲菴壽八十僧臘六十七師儀狀奇麗容止端默雖行出世間法而以營塔廟修齋供作佛事金帛之施歲一出之橐中無畱蓄在儀真時州民王氏婦病沒後配孟氏又病一日其姑誦經佛室中聞扣壁聲問之曰王氏也我有遺橐簪珥之屬盡歸孟氏可斥賣一二請天寧訥公說法使我解脫舍汝家而去孟氏亦復無恙家人卽日馳告師師至王氏憑附一女子立師側說法竟懽踴躍跪謝後數日現夢曰我已則受後身矣而孟氏病良已徐師書其事爲記在靈巖時平江大姓胡氏設大齋耆宿皆會前一夕夢人告曰詰朝有騎赤馬衣黃褐而至者辟支佛也黎明物色求之而師裘馬如夢胡氏舉室迎拜一坐盡驚靈岩寺據絕頂而井飲不給蓋數百年矣師擇地庀工伐石鑿井出泉清甘人不病汲今號佛海泉云儀真天寧僧伽一塔高數百尺并大輪藏壯麗甲于淮海皆師所爲孫尚書覲過而歎曰公材智不

下澄觀時方多故而隱於浮屠中可惜也其後五住靈巖築一室于方丈西偏孫登訪題曰五至畱詩而別暨師沒復銘其塔致哀慕焉

道謙傳

道謙建州游氏子家世業儒幼聰慧讀書輒成誦早失恃怙歎曰爲人子者不及甘旨之養當從浮屠氏學出世法以報罔極遂落髮謁佛果無所省發後隨妙喜菴居泉南及喜領徑山師亦侍行未幾令師往長沙通紫巖居士張公書師自以叅禪二十年無入頭處更作此行決定荒廢意欲無行友人宗元者叱

曰不可在路便叅禪不得也去吾與汝俱往師不得已而行在路泣語元曰我一生叅禪殊無得力處今又途路奔波如何得相應去元告之曰你但將諸方叅得底悟得底圓悟妙喜爲你說得底都不要理會途中可替事我盡替你只有五件事替你不得你須自家支當師曰五件者何事願聞其要元曰著衣喫飯屙屎放尿駝箇死尸路上行師於言下領旨不覺手舞足蹈元曰你此回方可通書宜前進吾先歸矣師見張公張公喜甚書自信二字爲贈師笑而受之回徑山妙喜見而喜曰建州子你這回別也後還里

住開善聲光大震將化侍者請偈師笑曰萬法本空
三界非有死生於何處安著忍爲駭俗態乎師行峻
而氣和接物優容不言自化亦宗門之傑出者也宗
元亦建州人依妙喜最久分坐說法張公帥三山虛
數院迎之不就歸里結茆號衆妙園垂語云這一些
子恰如撞著殺人漢相似你若不殺了他他便殺了
你未詳所終

良書記元菴禪師傳

處良書記字遂翁會稽山陰劉氏子九歲以童子得
度十三歲游諸方僅勝衣笠路人爲之驚歎初爲妙

喜侍者又從卮菴顏公爲書記英邁玉立游二師間
皆受記蒞餘事能文詞善筆札諸方翁稱良書記然
亦以議論皦核不少假借不爲諸方所容顧獨陸陸
衆中嘗居秀州法喜院舉香爲卮菴嗣蕭然數僧食
財半菽再歲退廬會稽海上適太常尤公守臨海起
師領紫橐復以縣大夫不樂棄去久之領崑山薦嚴
資福寺遂以疾逝淳熙十四年六月戊寅也遺言藏
骨廬山智林寺寺卮菴與師所同建也
元菴真慈者潼州李氏子初依成都正法出家具戒
嗣游講肆聽圓覺至四大各離今者妄身當在何處

畢竟無體實同幻化因而有省作頌曰一顆明珠在
我這裏撥著動著放光動地歸以呈其師其師詰之
師曰雖百千萬億公案不出此頌也其師以爲不遜
乃叱去因南游至廬山圓通時卮菴爲西堂爲衆入
室舉僧問雲門撥塵見佛時如何門云佛亦是塵師
隨聲便喝以手指胸曰佛亦是塵復頌曰撥塵見佛
佛亦是塵問了答了直下翻身勸君更盡一杯酒西
出陽關無故人又頌塵塵三昧曰鉢裏飯桶裏水別
寶崑崙坐潭底一塵塵上走須彌明眼波斯笑彈指
笑彈指珊瑚枝上清風起卮菴深肯之

了一傳

了一號焰堂奉化徐氏子方童幼時遇羣兒嬉戲隅
坐傍不語聞梵唄則躍起喜動顏色其父曰兒如此
當令事佛年十四祝髮大雲寺十六受經數萬言習
窮晝夜不息已乃歎曰如來最上乘無挾而徑造者
也事糟粕何庸卽入京從相國寺妙湛慧公游數年
盡其學爲高第復下汴絕淮經吳中浮浙上天台入
雪峯徧見諸耆宿表裏洞然中無疑者會妙湛來蒞
黃檗師自雪峯至學成行尊衆推爲上首師姿相奇
龐寡言笑危坐一榻淵然如古井冰有來叩者雲湧

泉落愈出而愈無窮性介特務自闊遠不交人事將詣雪峯朝議大夫曾恬與師厚善屬師致書抵福帥大資張公守師意其爲已納笥中弗出久之石泉虛席公曰黃檗上首故自強卽日移書遣騎迎師師謝不願使者至五反而後受他日公過師師出恬書且致不卽發之意公喜曰韞櫝之珍深藏而不市吾與師賓主無媿矣居三歲改蒞聖泉會左丞葉夢得來守福曰黃檗古道場今世名緇孰逾一公者飭使者具書幣以迎師至闔境緇素奔走出迎懽呼踴躍聲振山谷蓋師自石泉出世更三大剎積十五年演唱

真乘啓悟後學人人向道以師爲歸已而後將至稍通餉謝易置諸禪師一夕捨去歸卧雪峯故廬泉南守葉庭珪樂道之士也延之雲門再遷法石庭珪代還師亦反西湖雪峯菴卽妙湛所栖閉門終日人莫見其面若將終焉俄被旨住徑山紹興二十四年也徑山無一壠之地可耕而學衆數千指師入據丈室檀施大集不求而辨山有芝巖方丈遺址師嘗指其處謂其徒曰吾將築室居焉初不省所謂明年三月示微疾退處明月堂唱篋中衣供佛飯僧翼日黎明索筆書伽陀趺坐而逝壽六十四僧臘五十卽芝巖

塔其全身乃喻築室所云以此

文爾傳

文爾福州長溪人姓李氏十一辭親出家十六爲僧十七受戒十八裹足游禪會叅月菴果公無所入忘寢與食瘡痍徧體抱膝危坐每聞五更鐘聲輒駭汗曰又過一日矣後因觸物有省入爲侍者數年游廬陵爲衆迫請住吉水清涼院徙興國之梵山寧都之桃林紹興二十一年郡守李子揚初至嚴峭寡與獨有契於師迎住報恩報恩望刹棟宇久隳法席不振賴民貲少嗇施師接以誠慤咸竭其力堂構像設次第一新叢林成矣會齊述嬰城叛緇素宵潰師曰我去寺必墟止不動閱百二十日賊欲屢縱火加害師隨機解免舍匿士庶千計皆賴以全居十年引疾求去遂移慶雲地僻而用足異時主者自殖而已師至改造三門規創殿宇理事兼舉老而彌篤一日與門人行西圃指尋丈曰此存以待我未幾坐亡實乾道二年冬也報齡四十六坐三十一夏門人葬師所示之地丞相周必大爲石上之文謂師住報恩時妙喜杲公與無垢張公同時北歸士大夫日往叅請師初無言說妙喜獨謂無垢是人所得端實不可忽也予

聞斯語然後知師故以鈍爲利者自是益思與之游而宦牒推移會合之日殊少去冬師有過予意方報有書而師沒矣其爲時賢歆慕如此

從廓傳

宜意

從廓福之長溪林氏子幼穎悟不妄言笑羣兒強以聚嬉泊焉如弗聞喜聞出世法年十五祝髮受具戒時閩中多有道之士悉往從之游見佛心才才稱之又見嬾菴需公爲侍者復依大圓璞璞妙喜之高弟門風孤峻始齟齬久之豁然有得服勤數載大圓撫之以爲類已然以未識妙喜爲恨不憚重趼見於衡

之回雁峯下深加器重雷二年告歸送之以偈又以書屬璞曰廓佳衲子可爲成就使異日爲吾家種草紹興丙子妙喜被旨住育王復來依焉妙喜移徑山璞繼其席衆踰千數師爲第一座制師丞相沈公以廬山請出世妙喜方名冠天下無不願出其門以取重開堂日乃以辦香嗣大圓諸方以此益高之已而育王虛位尚書韓公邀妙喜請舉以自代而無如師也禪衲大集育王爲海內名道場以祖孫三人世濟宣闡遂爲叢林美譚師才具素高以其暇日興土木之工皆極其壯麗增庾入數千斛施者委金帛創爲

長生局五所百須皆備月施金錢飯僧以萬計又造金塔以奉舍利此特其餘事爾孝宗卽位之十五年詔舍利寶塔詣行在所師侍行旣至命入禁中觀堂安奉上御素膳焚香瞻禮親覩殊勝遂召師對碧琳堂問舍利從何發現奏曰從陛下聖心發現上大悅親書妙勝之殿賜師妙智禪師號仍度僧五員頒鈔萬緡眷賚優渥前所未有日本國王閱師偈語自言有所發明至遜國以從道歲修弟子禮辭幣甚恭且送良材建舍利殿器用精妙莊嚴無比丞相史公帥七閩以鼓山趣其歸榮陽郡王力挽無行魏王出鎮

一見風儀目爲僧中龍又聞其機辯峻發肅然加敬師晚以衣囊立菴於烏石山名以笑月爲終焉計有偈云三峯斂却閑雲大海冷涵秋月庚子季春拂衣歸菴杜門不與世接俄示微恙說偈而逝年六十二臘四十七葬於菴之寢室師家法嚴甚學衆以師語萃爲巨編師見而呵之曰汝輩隨語生解去道益遠固不許沒後乃始得百之一二刊之弟子百餘人有宜意者得法最佳的住平江開元方鳴道有聲而遽卽世吾黨惜之

退谷雲傳

附石橋宣公

義雲禪師福州閩清黃氏子幼入家塾成童入鄉較穎異有聲因讀論語中庸有所悟入後聞山堂淳禪師說法遂自斷出家徧游江湖至吳見鐵菴一大禪爲侍者鐵菴重之時佛焰倡道靈隱師往依焉及佛照移育王師從其行歷十年爲第一座佛焰聞其說法歎曰此子提唱宛如雪堂行和尚吾鉢袋有所付矣遂出住香山居五年徙台州光孝又徙鎮江甘露會平江虎丘萬壽皆欲延師師聞萬壽頗廢卽欣然就之淮南轉運使虞公儔又以長蘆來招師與虞公有雅故又從之會育王虛席朝命師補其處時佛焰方居東菴父子日相從發明臨濟正宗學者雲集會有魔事師卽捨衆退居香山蓋將終焉而朝命又起師說法淨慈恩光赫奕都邑聳動一日領衆持鉢畿邑是夕寺災無遺宇比師歸獨三門巋然在瓦礫中師不動容曰成壞相尋亦豈有常今日之壞安知不爲四衆作福之地哉天子聞之出內庫金以賜自重臣貴戚以下傾橐輦金惟恐居後未期年廣殿邃廡崇閎傑閣益愈于前日矣於是上爲親御翰墨書慧日閣三大字賜之開禧二年五月示微疾作偈別衆而寂壽五十八臘三十五住山十九載徒輩奉全身

塔于寺之東北隅

石橋宣禪師蜀嘉定許氏子叅佛焰得法住徑山創化城於雙溪之上接待雲錫師獲知丞相魯國一時名士大夫翕然宗仰幾與退谷並驅爭先但福緣小遜耳示寂塔於化城之後

笑翁堪公傳

妙堪號笑翁慈溪毛氏子廣額平頂骨氣清豪從野菴道欽受學以廣記多聞稱後一力叅究依息菴觀於金山又走靈隱見松源皆不契時無用居天童徑造其室用問曰行脚僧游山僧曰行脚僧用曰如何

是行脚事提坐具便搥用曰此僧敢來這裏持虎鬚俾叅堂一日用舉狗子無佛性話纔擬開口用以竹篋劈口打應聲呈偈曰大塗毒鼓轟地震地轉腦回頭橫屍萬里用頷之俾侍香尋命分座出世凡十坐道場皆海內名刹三被詔旨并諸名公卿推挽不得已而後就也雖荷禪宗重寄而不以其道自封其於佛淺深之說無不融了世出世法無不兼弘常曰於心有取舍識情未盡見法有彼此智眼未明天台舊無律宗居報恩也與大卿齊公議合十寺爲大刹築戒壇命負毗尼學者倡開遮持犯之法風勵新學台

始行南山宗也居靈隱山門逼近屠沽堪撒其廬揭
關飛來峯外以限喧寂曰不可使旃陀羅氣薰穢三
寶也荆湖總臣以國乏用奏僧道得以出貲買紫衣
師號俾領住持聞之歎曰苟如是則千金之子皆可
主法我道危矣因抗疏且致書秉鈞軸者其議遂寢
詔徙天童力辭東歸翠巖築室奉先世香火育王虛
席有旨起師再辭不許乃奉詔表章大覺祖述妙喜
秩然有序未幾復下天童之命大叅趙公請主淨慈
皆固辭謝之俄示疾書遺表作寺丞張公書通守永
嘉曹公來問疾從容敘世契移頃書偈曰業鏡高懸
七十二年一槌擊碎大道坦然置筆泊然而逝

松源嶽傳

崇嶽號松源處州龍泉吳氏子幼不好弄稍長慕出
世法二十三棄家衣掃塔服受五戒首造靈石妙公
繼見大慧杲禪師於徑山久之大慧陞堂稱蔣山應
菴華公爲人徑捷師聞之不待旦而行旣至入室未
契退愈自奮勵中夜自舉狗子無佛性話豁然有得
以扣應菴菴舉世尊有密語迦葉不覆藏師云鈍置
和尚菴厲聲一喝自是朝夕咨請菴大喜以爲法器
說偈勸使祝髮棟梁吾道隆興二年師始得度於臨

安西湖白蓮精舍自是徧歷江浙諸大老之門罕當其意乃浮海入閩見木菴永公木菴舉有句無句如藤倚樹師云裂破木菴云瑯琊道好一堆爛柴聾師云矢上加尖如是應酬數反木菴云老兄下語老僧不過如此祇是未在他日拂柄在手爲人不得驗人不得師云爲人者使博地凡夫一超入聖域固難矣至於驗人打向面前過不待開口已知渠骨髓何難之有木菴舉手云明明向汝道開口不在舌頭上後自知逾年見密菴於衢之西山隨問卽答密菴微笑曰黃楊禪爾師切于明道至忘寢食密菴移住蔣山華藏徑山皆從之一日密菴入室次問傍僧不是心不是佛不是物師侍側豁然大悟乃云今日方知木菴道開口不在舌頭上自是機辯縱橫鋒不可觸木菴遷靈隱遂命師爲第一座旋出世於平江澄焰爲密菴嗣遷江陰之光孝無爲之冶父饒之薦福平江之虎丘皆天下名山惟冶父最寂寞又以火廢師一臨之四方名衲踵至棟宇亦大興人謂師能使所居山大慶元丁巳被旨住靈隱居六年道盛行得法者衆法席爲一時冠而師有棲隱之志卽上章乞罷住持事上察其誠許之退居東菴俄屬微疾猶不少廢

唱道忽垂一則語以驗學者曰有力量人爲甚麼擡脚不起開口不在舌頭上又貽書諸嗣法囑令傳持大法因書偈曰來無所來去無所去瞥轉玄關佛祖罔措跏趺而寂實嘉泰二年八月四日也得年七十有一坐夏四十徒輩奉全身塔於北高峯之原

偃溪聞傳

廣聞閩之侯官林氏子家世業儒疎眉秀目哆口豐頤從季父智隆於宛陵光孝十八得度受具初見鐵牛印少室睦無際派追隨甚久聞浙翁唱道天童袖香謁之初見機道齟齬翁移徑山師踵至翁笑迎曰

汝來耶一夕坐簷間聞更三轉入室曳履而蹶如夢忽醒翌朝造翁室翁舉趙州洗鉢孟話師將啓吻翁遽止之平生疑情當下氷釋紹定戊子四明制闈胡公以小淨慈致之歷住香山萬壽雪竇育王淨慈靈隱徑塢八山所至革弊支傾廣容徒衆道化大行有云十字街頭石幢子無你遮護處一聲江上侍郎來無你迴避處衲僧家早出暮入脚前脚後也須仔細忽然築著磕著淨慈拄杖別有分付又云一升三合拄杖頭邊萬水千山草鞋跟底未言先領誰家竈裏無煙撩起便行是處井中有水莫道空來又空去許

多途路不相孤洗發精醒可謂善說法要矣景定四年壽七十五而化師法嗣頗衆而獨雲峯高止泓鑑二公能振起師道云

藏叟珍公傳

善珍字藏叟泉之南安呂氏子年十三落髮十六游方至杭受具足戒謁妙峯善公于靈隱入室悟旨後出住里之光孝升承天繼遷安吉之思溪圓覺福之雲峯復以朝命移四明之育王臨安之徑山上堂靈雲見桃花悟去玄沙道敢保老兄未徹香嚴聞擊竹悟去仰山道祖師禪未會禪和十箇五雙道我此一

門全無肯路示未知靈雲香嚴在要知二大老磨醉我落花天借他絃歌裏又據室云這裏便是問訊燒香了來老僧身邊玄地底所在麼呆子你自鈍置猶可莫來鈍置老僧師法語無拘滯大率類此門人貌師真請題揮云叅禪無悟識字有數眼三角似燕山愁胡面百摺如趙婆呷醋一著高出諸方敢道飯是米做生於紹興甲寅逝于嘉定丁丑年八十有三六住大剎接納良多而入室得髓者唯元叟端公一人而已端之後法脉繩繩至我明尚有振起作師吼者師之道源遠流長可知矣

如珏傳

如珏字荆叟婺州人圓悟五世孫癡鈍之子初見癡鈍室中僧問如何是佛癡鈍命師下語師答爛冬瓜卽呈頌曰如何是佛爛冬瓜咬著冰霜透齒牙根蒂雖然無窖子一年一度一開花癡鈍笑而可之後知過穆陵端平中有詔自育王陞住徑山始開堂乃述銘以諭衆曰幻身夢宅空中物色前際無窮後際寧克出此沒彼升沉疲極未免三輪何時休息貪戀世間因緣成質從生至老一無所得根本無明因茲被惑光陰可惜剎那不測今生空過來世窒塞從迷至迷皆因六賊六道往還三界匍匐早訪明師親覲高德決擇身心去其荆棘世自浮沉衆緣豈逼研窮法理以悟爲則心境俱捐莫記莫憶六根夷然行住嘿嘿一心不生萬法俱息結夏謂衆曰我此一宗正令全提如暴風卒雨鼓蕩無前石火電光追奔不及舉意卽迷源擡眸已蹉過不是目前法莫生種種心縱汝三種互修剋期取證第一頭第三首萬拄千掙轉見氣急殊不知觸體未具已眼先明因地一聲千了百當然雖如此親證者萬無一二錯會者數有河沙師見地高朗不多讓古人然福德因緣不無少遜或

云師功用比圓悟益弘或亦未之思耳

無準範禪師傳

師範梓潼雍氏子九歲依陰平山道欽出家經書過目成誦紹熙五年冬登具戒明年成都坐夏遇老宿名堯者範請益坐禪之法堯曰禪是何物坐是何人範受其語晝夜體究一日如廁提前話有省遂出蜀謁佛焰於育王焰問何處人曰劔州人焰曰將得劔來否範隨聲便喝焰笑曰這烏頭子亂做範嬾剃髮長故佛焰室中嘗以烏頭子呼之久之欲觀台雁拉石溪月公同往至瑞巖時雲巢領住持事畱分座忽

夜夢偉衣冠者持把茅見授翼日明州清涼專使至師受請入院見所設伽藍神茅其姓衣冠與所夢無異云上堂遂為破菴拈香以示法切得旨深也嗣遷焦山雪竇被旨移育王住徑山最久雖兩丁火厄而旋復舊觀號法席全盛理宗嘗召師入慈明殿陞座說法上親御垂聽大悅賜佛鑑禪師號併金襴僧伽黎淳祐戊申秋築室明月池上榜曰退耕乞老於朝而舊疾適作三月旦升堂別衆至十五日區畫後事親遺表及遺書十數封言笑如平時其徒以遺偈為請乃執筆疾書云來時空索索去亦赤條條更要問

端的天台有石橋移頂而逝

石田黃禪師傳

法薰號石田眉公彭氏子也生而慧敏三四歲時見僧卽喜年十六從丹稜石龍山法寶院智明出家二十二雜髮受具戒游方至石霜禮雷遷塔述偈曰一念慈容元不隔何須特地肆乖張平高就下婆心切惱得雷公一夜忙薰名因是大著聞吳門穹窿破菴先禪師道望遂往依焉一見知爲法器室中舉世尊拈華迦葉微笑薰云焦磚打著連底凍赤眼撞著火柴頭破菴陰奇之每於日用語默故起其疑薰於是

決志依栖隨時咨詢與無準範日相激勵後見松源岳肯堂充遜菴演咸謂其從作家爐鞴中來自不同也初住蘇州之高峯次遷楓橋鍾山虛席亦補其處寶慶初遷淨慈端平二年遷靈隱淳祐甲辰三月望示徒云但得本莫愁末喚甚麼作本喚甚麼作末松栢千年青不入時人意牡丹一日紅滿城公子醉山僧恁麼道若不肯底是我同叅弟子繪像求贊有云末後一句分付厨山衆訝之明日示疾而逝

癡絕冲傳

道冲自號癡絕武信長江荀氏子母郭氏嘗夢經山

木瓜樹下其實纍纍取而食之占者謂當產奇士已而師生豐上短下資稟過人長應進士舉不利受釋氏舉於梓州妙應院落髮游成都習經論有聲紹熙壬子出峽回旋荆楚間時松源倡道於饒之薦福徑造其廬適歲饑不受會曹源生公以雲居首座出世妙果許師入室俾侍香老拳痛棒不少貸至是平生知見絕無影響然終以未見松源爲闕然及松源遷靈隱師曰尚餘窮相一雙手要向諸方癢處爬至杭松源門庭高峻八閱月不得入每囁嚅欲自言屢呵斥不容近一日有告之松源者松源曰我已八字打開自是他當面蹉過師聞此語口耳俱喪始知侍曹源時嘻戲怒罵無非善呵方便旣而曹源順寂遍歷諸老之門踰二十年出世秀州之光孝金陵之蔣山福州之鼓山雪峯嘉熙戊戌有旨住太白名山適育王住持未得人因師之至又強之兼領師往來兩山間四方學者從之如歸教聞京師詔下移靈隱追念密菴松源舊游方思所以振起祖風而魔事出於意料所不及難以口舌爭遽動歸老故山之志伐鼓亟去雖京兆尹節齋趙公致書力挽堂帖有虎丘之命昇師虛齋趙公以蔣山起之俱莫能回其意戊申春

育王散席諸大老落落如晨星惟師爲叢林尊宿衆
舉于朝日夜俟師之出亦固辭乃已又有欲挽之爲
法華開山懇祈再三不得請而勅牒住徑山之命繼
至師謂先諾固不可違君命豈應引避乃以九月至
法華踰月登雙徑人神響應懽聲如雷師說法簡直
明爽不落窠臼嘗云盡乾坤大地無絲毫許大汝諸
人橫擔拄杖繞四天下行脚道我無處不到無事不
知且道西天那爛陀寺戒賢論師今日說甚麼法又
云有一人一念頓證墮在佛數有一人累劫闡提不
願成佛且道那箇合受人天供養良久云蝶穿芳徑
雙眉濕蜂掠殘花兩股肥詞旨高詣之如此俄染疾
自冬涉春形體雖羸陞堂提唱精明如平時忽手書
龕記并遺書十數封且口無準忌在十八吾以十五
卽行不得辦香修供矣侍僧駭其言亟以遺偈請師
笑曰末後一句無可商量只要箇人直下承當寂然
移頃而逝壽八十二師能誠無僞表裏如一待人恕
而立已嚴應世圓而領衆肅住山三十年所至以激
揚宗風爲已任以道法未得其傳爲已憂平居簡淡
沉嘿若不能言及坐籌室勘驗衲子機鋒一觸猶雷
奔電掣海立江翻皆茫然莫知湊泊誓不輕以詞色

假人重誤來學晚年無他好多畱意字法於小楷最得三昧往往端嚴凝重類其人僧俗歸敬求法語偈贊無虛日雖祁寒盛暑揮染不倦士大夫多樂從之游而尤爲名公鉅卿所推重以至教名宣傳海外有具書禮犯鯨波而來問法者其道德有以服人一至於此方在天童育王時被旨開堂靈隱束擔將戒行而隣峯疾之者教言欲啖羣不逞梗於中道左右聞之奉以告師曰吾平日以誠實接人將何以加我略不爲之動彼亦終於無所施而止雙徑冷泉太白雪峯爲海內甲刹萌欲速之念者挾奧援矜智巧曆階而上力可以通神師則不然短褐布衣終其身不爲勢利所動故其進不由介紹其退心常泰然真法門之梁棟後學之標準也

景蒙傳

景蒙邵氏溫之平陽人族姓甚衆多以儒顯師英達開爽幼聞鐘梵則喜年十三從惠安淨覺大師惟梵著僧伽黎明習天台教觀自以名相之學不足了大事去游國清又叅育王佛智裕公公問鄉里對曰永嘉曰還識永嘉大師否未及答批頰而出至於再兀然如癡寢食不安者累月行道次忽聞鐘聲而悟卽